

PROF. DR. SAMIR BEGLEROVIĆ
IZVODI IZ IZRAZA SUĆUTI (TA‘ZIJJE)

Nakon preseljenja na bolji svijet prof. dr. Samira Beglerovića, šefa Katedre za akaid, tesavvuf i uporedne religije i sekretara Vijeća za postdiplomske i doktorske studije Fakulteta islamskih nauka UNSA na adresu Fakulteta islamskih nauka u Sarajevu, dekana Fakulteta prof. dr. Zuhdije Hasanovića i Katedre za akaid, tesavvuf i uporedne religije stigle su brojni usmeni i pismeni izrazi sućuti (ta‘zije). Svoje usmene ta‘zije Dekanu Fakulteta uputili su reisu-l-ulema Islamske zajednice u Bosni i Hercegovini Husein ef. Kavazović, zamjenik reisu-l-uleme prof. dr. Enes Ljevaković, direktor Uprave za nauku i obrazovanje Rijasetu Islamske zajednice prof. dr. Dževad Hodžić i brojni drugi prijatelji Fakulteta i prijatelji r. prof. dr. Samira Beglerovića.

Pismene izraze ta‘zije, sućuti i saučešća, na adresu Fakulteta, Dekana i porodice r. prof. dr. Samira Beglerovića uputili su brojni drugi vjerski dostojanstvenici i akademski djelatnici.

U ime Mešihata Islamske zajednice u Crnoj Gori i u svoje ime *hatarnamu* povodom preseljenja uvaženog prof. dr. Samira Beglerovića Nastavnom vijeću Fakulteta islamskih nauka uputio je reis Rifat ef. Fejzić.

„Saosjećamo sa vama u boli jer je rahmetli dr. Beglerović bio divan insan, profesor i nadasve odgajatelj.“

U ime Muftijstva tuzlanskog ta‘ziju je uputio muftija Vahid ef. Fazlović.

„U ovoj tužnoj prilici, mi u Muftijstvu tuzlanskom, dijelimo sa vama duboku bol. Na Bolji svijet sa sobom nosimo naša djela, a plemenita djela našeg brata Samira Beglerovića obavezuju nas da ih pamtimo i prenosimo generacijama koje dolaze poslije nas. Molimo Allaha, dž. š. da rahmetli Samiru podari džennet, najljepšu nagradu za njegov dugogodišnji hizmet svojoj vjeri i Zajednici, a svima nama snagu strpljivosti.“

U ime Muftijstva mostarskog, najdublje izraze susosjećanja uputio je muftija Salem ef. Dedović.

„U ovoj tužnoj prilici mi u Muftijstvu mostarskom dijelimo sa vama bol zbog vašeg gubitka, znajući da je prof. dr. Samir Beglerović bio cijenjeni alim i rado viđen gost na naučnim skupovima i okruglim stolovima u Mostaru i Hercegovini. Izraze suosjećanja upućujemo i njegovoj porodici. Da im milostivi Allah podari sabur i olakšanje, da kao istinski mumini podnesu ovo iskušenje.“

U ime Muftijstva bihaćkog, u svoje ime i u ime velikog broja studenata i imama sa područja Muftijstva bihaćkog izraze suosjećanja uputio je muftija bihaćki hfz. Mehmed ef. Kudić.

„Profesor Beglerović je kroz svoj intelektualni angažman, objavljena djela i brojna mentorstva dao nemjerljiv doprinos u obrazovanju i stasavanju velikog broja naših imama i profesora odgojno-obrazovnih institucija. Pored toga, profesora Beglerovića ćemo se sjećati po njegovim brojnim vrlinama: skromnosti, odgovornosti, susretljivosti te nastojanju da svima bude na raspolaganju i pomoći, zbog čega je uživao veliko poštovanje među studentima.“

Saosjećanje i iskrenu ta‘ziju u ime Muftijstva travničkog uputio je muftija travnički Ahmed ef. Adilović.

„Smrt rahmetli dr. Beglerovića nije samo gubitak za njegovu porodicu, rodbinu i prijatelje već je to veliki gubitak za Fakultet islamskih nauka kao i za Islamsku zajednicu Bosne i Hercegovine u cjelini. Želimo iskazati svoje saosjećanje, veliku tugu i bol zbog njegove iznenadne smrti moleći Allaha dž.š. da mu se smiluje, da njegov kabur učini jednom od džennetskih bašči, uvede ga u dženneti firdevs u društvo poslanika, šehida i iskrenih Allahovih robova, a da njegovoj porodici, rodbini i prijateljima podari sabri džemil.“

Prof. Fra Ivan Šarčević, veliki prijatelj Fakulteta i prof. dr. Samira Beglerovića je napisao:

*„Poštovani dekane Hasanoviću!
Pogodila me je vijest o smrti profesora i kolege Samira Beglerovića.*

Plijenio mi je taj čovjek mirnoćom i suzdržanošću u riječima i odlučnom skromnošću u tumačenju vjere.

Izražavam sućut Vama, kolegama profesorima FIN-a.

I molim Vas, ako imate kakvu priliku, prenesite izraze moje sućuti njegovoj supruzi i obitelji.

Vjerujem da je Samir već u Božjoj milosti.

Neka mu je vječni pokoj/rahmet!“

Prof. dr. Vladislav Topalović, dekan Pravoslavnog bogoslovnog fakulteta UIS, Dekanu i članovima Nastavnog vijeća uputio je svoje saučešće:

„Primate iskreno saučešće povodom smrti prof. Samira Beglerovića. Profesora Beglerovića upoznao sam još daleke 2000. godine u vrijeme kada smo se susretali u okvirima organizacije "Abraham". Prenesite moje izraze saučešća kolegama i porodici.“

Saučešće povodom odlaska kolege Samira Beglerovića uputio je prof. dr. sc. Hrvoje Jurić sa Filozofskog fakulteta Sveučilišta u Zagrebu.

„Poštovani gospodine dekane Hasanoviću,

povodom odlaska kolege, suradnika i prijatelja Samira Beglerovića - za koji sam saznao od kolege i prijatelja Orhana Jašića - Vama, kao čelniku Fakulteta islamskih nauka u Sarajevu, te svim Vašim kolegama i kolegicama, kao i porodici Samira Beglerovića, izražavam iskreno saučešće, još uvijek ne vjerujući da nas je Samir tako iznenada napustio.

Vjera zasigurno nudi objašnjenje i utjehu, ali svejedno nama koji ostajemo za Samirom nastupa jedna praznina koju ćemo morati nastojati ispuniti toplim sjećanjima na njega kao osobu i na sve ono čime nas je kao čovjek i znanstvenik obogatio.“

Prof. dr. Lino Veljak, profesor filozofije na Filozofskom fakultetu Sveučilišta u Zagrebu poslao je svoju sućut.

*„Poštovane kolege,
pogođen viješću o preminuću poštovanog kolege Samira Beglerovića, molio
bih da njegovoj obitelji prenesete izraze moje iskrene i duboke sućuti.“*

Srđan Vidačković, student master studija Međureligijski studij i izgradnja mira uputio je svoje izraze saučešća.

*„Izuzetno me je rastužila vijest o smrti profesora Samira Beglerovića. Ovim putem
želim cijelom kolektivu i studentima Fakulteta islamskih nauka na čelu sa dekanom prof. dr.
Zuhdijom Hasanovićem izraziti saučešće povodom Profesorove smrti.“*

**Pismo saučešća Dekanu i kolektivu Fakulteta islamskih nauka uputio je i dekan
Pravnog fakulteta Univerziteta u Tuzli, prof. dr. Amir Karić.**

*„U povodu preseljenja na Ahiret dragog nam kolege prof. dr. Samira Beglerovića,
izražavam duboko suosjećanje žalosti Vama, akademskom osoblju i svim zaposlenicima
Fakulteta islamskih nauka. Profesor Samir Beglerović će nam nedostajati. Njegova
plemenitost i blaga narav ostat će nam svima u najljepšem sjećanju.“*

**U ime kolektiva Islamskog pedagoškog fakulteta u Bihaću izraze ta'zije, uputio je dekan
prof. dr. Hajrudin Hodžić.**

*„U ime kolektiva IPF-a u Bihaću i u svoje ime izrazavam ta'ziju, moleći Uzvišenog Allaha da
se smiluje rahmetli profesoru, a njegovoj porodici i kolektivu FIN-a podari snage i sabura.“*

